

晚

晴

移

詩

匯

晚晴簃詩匯卷四十三目錄

施閏章 八十六首

晚晴移詩匯卷四十三

徐世昌

施閏章字尙白一字岷雲號愚山宣城人順治己丑進

士歷官江西分守湖西道布政司參議康熙己未召

試博學鴻詞授侍講遷侍讀有愚山先生學餘集

王貽上曰余讀愚山侍讀五言詩愛其溫柔敦厚一

唱三歎有風人之旨其章法之妙如天衣無縫如圍

客獨滿約略舉之若酒盡暮江頭人日日初晴月明

無遠近倚枕不能寐諸篇是也至於清詞麗句皆見

層出余仿張爲主客圖之例摘其尤者列以爲圖與

康樂池塘生春草元暉澄江淨如練并資藝苑談助

妙格律深厚日愚山文章醇雅而於詩學尤邃體氣高

南施北宋之目全紹衣日愚山造詣殆與魏敏果

湯文正陸清獻同道同德顯愚山最爲闇淡又以工

所發舒清獻遭摧折而愈顯愚山最爲闇淡又以工

於詩古文詞反掩其學問之大原世有合作韓范文

富歐馬六公年譜

者其必班而齊之

詩話愚山治性理之學出而蒞政廉明慈愛澤加於  
生民其為湖西道駐臨江江環城而流民號曰使君  
江以喻其清在當時實唯州當湖一流人特以夙負  
詩名晚又以詞科進稱之者遂詳其文學而行詣厚  
事若稍略焉其詞學正與行詣詳其政事相發根柢  
為有德之言如華嚴樓閣學詩於漁洋嘗就問焉恩  
子師論詩一如華嚴樓閣學詩於漁洋亦心折其言  
璧木石一俱從平地築起漁洋亦心折其言惟漁  
洋專稱其五言近體嘗舉剡風一夜至一篇以爲驚  
心動魄不減十九首摘句圖所列名篇略備劉海峯  
論列歷朝詩亦但錄五律之五十餘篇然愚山詩精  
嚴堅栗各體皆同正不徒四十賢人著一屠沽不得  
也

浮萍兔絲篇

李將軍言部曲嘗掠人妻既數年攜之

新婦則兵之故妻也四人皆大哭各反其妻而去予爲作浮萍兔絲篇

浮萍寄洪波飄飄東復西兔絲冒喬柯裊裊復離披兔絲  
斷有日浮萍合有時浮萍語兔絲離合安可知健兒東南  
征馬上傾城姿輕羅作障面願盼生光儀故夫徒旁窺拭

目驚且疑長跪問健兒母乃賤子妻賤子分已斷買婦商  
山陞但願一相見永訣從此辭相見肝腸絕健兒心乍悲  
自言亦有婦商山生別離我戍十餘載不知從阿誰爾婦  
既我鄉便可會路歧寧知商山婦復向健兒嬸本執君箕  
帚棄我忽如遺黃雀從鳥飛比翼長參差雄飛占新巢雌  
伏思舊枝兩雄相顧詫各自還其雌雌雄一時合雙淚沾  
裳衣

棗棗曲

海陽有香棗蓋取二棗剝剝疊成中屑茴香以蜜漬之好事者持爲遠餉詢其始則商人

婦所爲寄其夫者義取早  
早回鄉云予爲作棗棗曲

井梧未落棗欲黃秋風來早吹妾裳含情剝棗寄遠方綿  
綿重疊千迴腸封題寄去憑君語棗甘誰道妾心苦閨中  
不識望夫山君看淚溼牀頭土

宿山家

山行路自遠孤客魂易迷暮鳥各歸去啾啾向我嘒暝色  
冒四野小徑多蒺藜俯見林麓下鐙火臨礪蹊舉策一叩  
門四壁風淒淒主人進粗飯努力療渴飢來時經虎穴宿  
處連雞棲平生戒垂堂飄零緣鼓鼙客久望人憐使我顏  
色低中宵萬感集不寐聞霜雞

濟北懷故人

渚煙昏夕岸四望無孤城舟中一步地百蟲繞我鳴蟲鳴  
爾自適不謂傷人情漁翁進雙鯉一壺聊自傾忽憶故人  
夢昨夜宛平生觴酌聚鄰曲歡呼無停聲今夕復何夕獨  
坐空屏營

粵西亂後懷平樂太守尹莫階同年

予本臥疴人乃乘相如傳浩蕩越江湖迢遞歷鄉縣分符  
值朋舊天末各眷戀就中有尹生才名冠吳甸素心炯白  
日紫瞳掣流電銜命守昭州魑魅日中見飲水愁毒淫官  
庖無完饍藩鎮善督責汗顏甘訶譴誅求義不忍出質到  
妻釧播遷兩及期元鬢颯已變聞我萬里來握手驚拭面  
灑掃先下榻契闊共餐飯煦沫及僮僕敝衣爲補繕傾橐  
治我裝左右色無倦二子汗血駒齟齬挺英彥論文受甲  
乙悲歌雜歡宴移觴松樹根濡翰鸛鵒研陶陶夜未央羽  
檄喧轉戰桂嶺走鯨鯢昭江紛組練城荒無駐卒路阻絕  
鄰援爨婢罷晨炊勺水不下嚙我行已倉皇君意反繾綣  
中廚呼酒漿妻孥淚如霰餞我登竹舸揮涕苦相勸封疆  
我則死風鶴子當遠訣別水聲中纜解急飛箭瘴雲落日

昏耳目驟驚眩但見遁逃人男女相蹂踐別來斷消息枯蓬各飄轉蒼梧殺氣高銅柱妖氛纏巢卵得無覆頸血恐已賤詩書故多難鬼神不錄善長號敘悲憤戰地儒冠賤

過翬嶺

崇岡鬱峻嶒鳥道繞山腹仰探白日短俯瞰陰霞伏魚貫度行人疲馬艱躑躅春晴多好風吹我巖壑綠農耕嶺上雲婦飯溪中犢羈心曠登陟瘠土見風俗華陽靈蹟闕杖策尋石屋

星峯亭作

亭前有坑始皇所鑿以泄王氣

觸雨陵山椒陟巘展朝霽危亭冒嶇嶇漲水明埤現左曳羲和車右把天姥袂白雲何連蜷髣髴有根蒂秋草榮春華山鬼善凝睇坑勞秦帝鑿嶺想謝公憩豁達萬古情流



觀四山際

途中望西山

黃沙滿襟袖客懷無一展時夢江南游青山情不淺今晨  
覺爽氣悠然見絕巘巘巘旣峻嶒邈邈何曠緬塞垣千里  
接白雲共舒卷霽色落長安空翠無近遠賞心誰與諧靈  
境終當踐雖無薜蘿衣一洗風塵眼

入西山

馬首見西山乘興陶嘉月振策峯已紆捫蘿巘逾絕蘭榭  
耀玉岑菌閣陵天闕琪樹寒始花紅藥蕊初結披拂散心  
顏榮落皆愉悅暮鳥歸巖扉陰雲如積雪松林息萬籟清  
響中夜發樵隱易爲歡市朝性所拙眷言采芝人毋使春  
芳歇

妙高臺夜坐懷无可

卽子瞻佛  
印賦詩處

日落水煙起茫茫連岸白  
褰裳陟高臺涼月皎秋夕  
古人  
不我待露氣霑瑤席  
忽憶龍眠叟遠引就禪寂  
桂嶺舊擔簦匡廬復飛錫  
游詠與之俱屢折登山屐  
勸我學無生危言同振溺  
心跡未能併出處尙狼藉  
解帶思同游天末久  
離析人生無老少  
皆爲天地客東望海門深  
南睇江雲碧  
巖壑留清暉皓歌傷往昔

早春三天洞至仙人巖

寒巖斂衆妙惠風蕩疏木  
洞穴無人居玲瓏闢華屋  
春陰香乳流谷溫瑤草綠  
出戶見前峯重雲無斷續  
乘興復杖藜行歌散煩促  
古樹含丹葩餘雪長靈瀑  
僧扉鑿陽崖茶臼入深竹  
采眞客安往悵望空山曲

上天竺雙檜峯

昔聞九里松夾路響清瀨今尋雙檜峯壁立衆山外危磴  
壘丹梯陰霞成紫蓋平臨江海寬俯看邱壑碎人生若飛  
簾倏與流飈會濡首塵埃間寧識滄洲大乘風叩闥闔浮  
雲接衣帶

湖西行

節使坐徵斂此事舊所無軍糈日夜急安敢久踟躕昨日  
令方下今日期已逾攬轡馳四野蕭條少民居荆榛蔽窮  
巷原田一何蕪野老長跪言今年水旱俱破壁復何有永  
訣惟妻孥歲荒復難鬻泣涕沾敝襦腸斷聽此語掩袂徒  
驚吁所慚務敲朴以榮不肖軀國恩信寬厚前此已蠲逋  
士卒待晨炊孰能緩須臾行吟重嗚咽淚盡空山隅

大阮歎

叢山如劍戟灌木蔽嶽岑其水獨南流谿谷皆阻深山民  
鳥獸居不馴匪自今追呼敢逆命兵革踵相尋未能靜伏  
莽火烈悲焚林殺人稅無出遲回傷我心蚩蚩亦赤子念  
爾爲沾襟招手語父老鴟梟懷好音宿逋旣累歲敲骨力  
難任民頑實吏拙許身愧南金何時免素餐引疾投吾簪

竹源院

殺虎防啞人芟蔓莫留根留根終遺患傷心不可論竹源  
數百家今餘幾人存竹外有源泉血流泉水渾羣盜故比  
鄰姍姍如弟昆反戈相啖食收骨無兒孫熒熒數竄婦零  
落依空村凶年嗟半菽撮土招游魂人亡畝稅在淚罷還  
聲吞

宿黃樞舖

積雨暗千山陰雲催日暮哀此僕夫痛踟躕宿中路土室  
倚頽垣荒村存老嫗勅吏慎勿擾芻粟可自具吏言爨無  
薪乞糴亦無處時危供億艱含悽未忍怒盜賊兼虎狼空  
山懷百慮從騎夜擊柝宵分屢驚寤明旦風雨中雞鳴驅  
馬去

臨江憫旱

瘠土嗟薄穫歲豐長忍飢戎馬況疊跡田園成路蹊荷鋤  
代牛力播種良苦疲朱火肆燎原禾稗同一萎民亂如恐  
後況乃驅策爲徒跣呼百神嗚咽致我辭政拙未敢苛召  
災今則誰雲漢何皎潔箕斗正參差心知閭閻遠側向高  
天曉明日急芻餉吞聲重涕洟

化成巖

宜春

雲木鬱江曲心知好邱壑攀蹬尋窅深穿巖得疏豁萬古  
青蓮花蒼寒半舒萼鐘歇灘響聞雲開峯翠落荒臺存往  
蹟暝煙見城郭延目散襟顏倚石就觴酌卻羨無心雲逍  
遙去寥廓

悲野雀

枌榆繁羽族瑣細無定名所謀非稻粱不與雞鶩爭張羅  
始何日遂使風俗成機發盡掩覆一羅殲羣生持此飲啄  
具充君鼎俎烹苦慚託體微不足一杯羹同類爲啾啾失  
侶長哀鳴君輟筵上箸請聽檐外聲

天涯路

天涯望不極盡是行人路日日換行人天涯路如故渺渺

白雲遠萋萋芳草暮來者知爲誰但見行人去

懷浮山詩寄藥公

我聞浮渡山好峯七十二巔另排空冥窈窕鑿深翠石洞  
窮雕鐫森然百物備窟龍自雷雨山鬼棲薜荔巖高倒景  
明下見浮雲墜出沒隨江煙虛無不在地奧區爲誰造靈  
蹟此中閤中有冥心人高言越世事抉剔開混茫乾坤受  
軒輊我性癖邱壑馳情有真寄行將策杖游餐霞破憔悴  
夾山樣

礪砢經峴首窈窕窮湖甸穿浦盪層雲望山成九面激澗  
游將窮孤光開匹練和風衣帶緩擊汰水波濺輕橈戛蒲  
葦敲側信迴轉日晚巖更青洲長樹逾蒨松篁交晻靄林  
屋時隱見舉芳興屢延怡目輒難徧當爲汗漫游枕漱從

所便

登太室中峯

壯士貪名山如海吞百川東游臥日觀羲和親比肩南使  
經衡嶽霧雨悵遷延近思太華頂遠夢崑崙巔嵩高在眉  
睫振策窮攀緣詰曲蛇徑緬幽陰熊館穿冉冉極天際舉  
頭觸星躔宅中環四嶽一氣何盤旋風雨鬱交會蛟龍走  
連蜷樹杪忽橫練坐見黃河懸窈窕搏衣石淒清玉池泉  
引領眺箕顓巢許方陶然辛苦茂陵客壇時飛荒煙有爲  
終滅沒瑤玉空雕鐫帝休昧珍木石室闕誰傳長憐肉食  
者虛無求僊佺

尋光福寺

新月已在天餘霞猶隱樹柔艣漾清波直隨塔影去不聞



水際鐘但聞煙中語借問隔船人僧廬向何處

野店篇

祁陽山中斷行旅萬嶺參天天欲雨松杉百里一茅店樵  
髻老翁作蠻語土垣半倒撐樹枝白日空庭走飢鼠驚看  
上客車馬多卻立低頭色如土連年此地莽邱墟行人露  
宿飼豺虎生兒箐中已八歲不識門前樹禾黍官來給種  
新買犢卧無莞簟炊無釜遺黎擊柝夜燔薪防虎中宵有  
伏弩客聞歎息亦吞聲亂後天南鮮安堵吾語老翁汝勿  
苦日暮壺漿不索汝過吏游兵愼莫嗔主人去此適他所

廬山遇雨

山下自晴山上雨林深苔滑流石乳杖藜撥雲雲不開洞  
口老猿作人語忽聞天際一鐘鳴隔水蒼茫尋磻戶

憶昔行寄宋荔裳隴西

辛卯冬于役西粵宋員外琬坐繫泣贈長歌呼子謝宣城

時同門尹使君明廷守昭州故與宋善詩中兼及之及粵西亂後子歸居先王母憂宋已脫難遷吏部尚書郎絨書相慰勞而昭州計至未幾宋又出備兵隴西三年之間忘形故人生死離合四顧潸然追憶往事作是詩

雕蟲滿眼何紛紛安得麟鳳開其羣騷之苗裔今宋玉風  
流儒雅揚清芬宣城後身吾豈敢文章膠漆良殷勤憶昔  
西曹別離苦倉皇不盡臨歧語北辰南極阻且長一曲驪  
歌淚如雨蝮蛇游處鷓鴣嘯山魃一腳向人舞傷心瘴癘  
復烽煙徒跣中宵避豺虎聞君騰踏黃金臺離愁乍破歡  
顏開隴頭流水忽鳴咽西方千騎遠徘徊李密回車淚空  
盡昭州斷魂招不來願逐西風墮爾側彈箏夜醉葡萄杯  
黃花白露風淒淒拂塵開篋把君詩宵冥風雨鬼神泣窳

綠山林猿鶴悲我有一幅冰蠶絲裁成綺服遺阿誰天寒  
河凍關塞遠腸斷思君知不知

趵突泉送嚴子餐都諫北還

時主考山東

傳聞此泉來王屋伏流倒涌歷山麓寒光噴雪復飛雲大  
聲奔雷小碎玉故人黃門天上來崔嵬百尺龍門開憑陵  
日觀照滄海咄嗟坐嘯生風雷臨流復有千尋閣白雪聲  
名赫如昨黃門揮翰似青蓮更擬新篇致康樂爲君開尊  
握君手素心海內真良友年將強仕相伯仲忍使離居成  
皓首扁舟昨日明湖游驪歌今日生離憂君不見濟南七  
十二泉皆在眼那堪溝水東西流

天逸閣雪後醉歌

主人梅幼龍  
耦長攜酒

一冬無雪春雪好名園飛閣開晴昊主人逸興有籍咸把

酒呼朋歡絕倒沙霽初聞白鳥鳴雪殘半露青峯小麻姑  
焯約墮窗間疊嶂參差浮樹杪細數梅花多昨日坐看新  
瀑通寒沼觥籌歷亂興偏豪石檻苔痕不須掃此閣峻嶒  
高百尺先輩聯翩著靈蹟禹金明三兩蚪蚪深藏禹穴書  
先輩讀書處賦詩日集梁園客二十年來玉樹摧竹榭茅屋蔓蘿薜拙  
毫授簡待吾曹肯使中原少詞伯前年鐵騎城頭嘶出門  
一步迷東西芳春暇日此良宴何辭斗酒聽黃鸝我思置  
閣臨雙溪種梅高下溪雲齊花前歲歲同春酌醉醒遞換  
無端倪

藥公拈余浮雲一洗萬峯出作畫并題短歌見貽依  
韻報謝

藥公別具神仙筆照夜青藜逢太乙手翻滄海弄白日興

酣筆落如箭疾千巖萬壑何周悉爲我倒縮蓬萊歸一室  
雲蒸霧合天地一半空風雨泉聲出

嵩陽雨夕懷王昊廬侍讀

登封城郭嵩之陽翠嶺青冥雲錦張重雲三日雨如霰滿  
耳蟲聲秋葉黃此時獨坐生白髮忽憶美人邈金闕開尊  
永晝坐論文捲幔清宵同對月長安車馬無時休臨歧執  
手重淹留浩歌早識名山興瑤華送我尋嵩邱一生當著  
幾兩屐放眼一步成十洲看君亦有向平意望遠那免張  
衡愁玉女窗擣衣石來朝新霽凌絕壁與誰共作峯頭客

白龍潭上桃花源作

地近藥銚丹井一名藥谷舊有蓮花菴

黃山峯壑幾千曲客游先就桃源宿杖底殷殷雷繞身樓  
頭洶洶濤崩屋清夢全醒風雨聲深林匹練中宵明曉起

白龍掉長尾四山飛瀑來喧爭怪石礪礪排盾戟寒潭冰  
雪澄空碧隔溪古寺斷疎鐘偃木垂藤纏絕壁匡廬三疊  
天下稀嵩嶽九龍稱神奇何如此地獨兼併咫尺衆壑蟠  
蛟螭複磴叢篁白日暝還沂藥鉤尋丹井轟磕不聞人叫  
呼倚杖空亭發深省問君蓮花菴在無連朝細雨山模糊  
屋角一圭破雲影青鸞舞處看天都藥谷仙源難具陳琪  
花紫翠秋爲春憑君傳語武陵客笑殺桃源洞裏人

華山歌贈王山史

華山突兀凌八荒仙掌擘畫摩青蒼洗頭盆水瀉銀漢斜  
挂星辰森在旁攀絙直上幾千仞俯看海日生扶桑韓愈  
當年驚眩處昔爲絕險今康莊誰能羅致歸戶爚瑯琊先  
生有草堂霞舉煙霏何爛漫杖藜散帙隨昏旦奔騰腕下

走鍾王研索牀頭窮繫豕安車強起棲僧閣夜夜山中夢  
紅藥蹠蹠金門懶上書公卿縞紵還垂囊先生豈是塵中  
人披帷慙就多逸民所歡顧況尤比鄰謂亭林先生華山不作  
終南徑看爾三峯頂上身

### 太白祠

太白騎鯨去空留采石祠當軒千里水繞屋萬松枝山月  
長清夜江雲無盡時誰將一尊酒把臂共論詩

### 燕子磯

絕壁寒雲外孤亭落照間六朝流水急終古白鷗閒樹暗  
江城雨天青吳楚山磯頭誰把釣向夕未知還

### 秋夜送楚客

酒盡暮江頭歸心水急流月明分手夜風逐去帆秋客裏

添新鬢潯陽憶故邱前途君自愛寒露滿汀洲

亂後和劉文伯郊行

斜日照荒野亂山橫白雲到家成遠客訪舊指新墳戰地  
冤魂語空村畫角聞相看皆墮淚風葉自紛紛

與王兆京同年宿敬亭

不辨翠微色秋山紅葉重褰裳隨去鳥拄杖倚孤松人臥  
半牀月風傳萬嶺鐘曉攀天際閣目斷白雲峯

慈仁寺松

直欲凌風去翻從拂地看摧殘經百折偃仰鬱千盤老閱  
山河變陰兼日月寒支離爾何意不厭臥長安

力疾赴官比部奉別家叔父

抱疴甘伏枕語別卽沾巾風雨殘春路關河獨去人無才



安宦拙甯儉補家貧祿養嗟無及吞聲憶二親

滄湖尋邢敬之

四海倦游後還疑汎愛非寸心如落木逢爾復春暉移榻  
連蔬圃烹魚出釣磯清歡成信宿不是醉忘歸

登江夏洪山寺塔

時官單  
方南征

峯頭開古寺塔下俯浮雲山勢龜蛇鬬江流沔漢分柳荒  
陶侃廟風競伏波軍南望湖光白鴻歸度夕曛

大庾嶺

峭壁何年鑿炎洲此路開門容一騎入人度萬山來南北  
各回首干戈更築臺蓬蒿行處滿漫說嶺頭梅

人日涇川

人日日初晴春風昨夜生野梅誰早折凍土又新耕餘雪

涓涓白流淅瑟瑟鳴琴谿開控鯉駐馬一含情

懷蔡大美江行戲柬

作客歸無計應知夢草堂浮名驅策遠小婦別離長江路  
多春雨山村易夕陽牡丹開太早不及共君觴

錢聖月重至宛陵有紀年詩

記昔論文處寒雲落敬亭人驚亂後在山比別時青甲子  
存詩史滄洲賸客星十年一尊酒判醉不須醒

九華山東巖

旁有天柱峯王文成嘗燕坐東巖

山到東巖好橫開翡翠屏招提含宿雨洞壁倚寒星杖底  
千峯小煙中九子青昔人曾燕坐天柱一荒亭

懷方邵村使湖南

水國春方漲扁舟去渺然波平嶽麓寺天入洞庭船下瀨

征蠻地長沙弔屈篇勞臣有王事郢曲幾時傳

厯下送梅子翔歸里

朔風一夜至庭樹葉皆飛孤宦百憂集故人千里歸岱雲  
寒不散江雁去還稀遲暮兼離別愁君雪滿衣

湖心寺

上方浮近浦繫艇卽當門沙漱通寒氣階基落漲痕孤城  
春水岸歸鳥夕陽村欸乃歌聲入空庭未覺喧

秦淮閣夜

明月非霜雪滿城生夜涼閣浮楊柳岸風接芰荷香漁火  
平臨檻蟲聲暗逼牀誰憐河漢淺牛女獨相望

懷梅幼龍移居

何處尋梅尉移家就蔣村怒流安水碓深樹蔭柴門詞賦

閒居得漁樵晚計存城東虛草閣寂寞野雲昏

薛子壽見示免官後詩感而有作

起句用薛語

虎豹真慈物斯言淚滿衣  
全生猶過望多難始知非  
黃葉連江下孤帆冒雨歸  
布袍安穩著長掩故山扉

薛脫繫卽以布袍終身

### 舟中立秋

垂老畏聞秋年光逐水流  
陰雲沈岸草急雨亂灘舟  
時事詩書拙軍儲嶺海愁  
浮饑今有歲倚棹望西疇

### 發宜春

新霽岫雲輕春風送客行  
高臺迴嶂隔深樹雜花明  
村徑半牛跡山田皆水聲  
出門纔幾日鷓鴣已先鳴

### 中夜

時有星變

倚枕不能寐惟含中夜情爲誰催白髮持底答蒼生天意  
星辰見秋聲鼓角清已聞哀痛詔羣盜忍縱橫

侍家叔父同諸公集來鳳亭

移棹忽聞鶯芳洲此日晴樹陰連野闊山翠入江明倚醉  
親魚鳥行歌答友生不知春草色何與故園情

贈商賢

京洛歸何日狂歌興不違家傳殉國劍身老釣魚磯作客  
燒黃獨尋僧臥翠微風流滿江漢祇覺似君稀

泊樵舍

漲減水逾急秋陰未夕昏亂山成野戍黃葉自江村帶雨  
疏星見回風絕岸喧經過多戰艦茅屋幾家存

過湖北山家

路迴臨石岸樹老出牆根野水合諸澗桃花成一村呼雞  
過籬棚行酒命兒孫去矣吾將隱前峯恰對門

雨後

歸田復多病寒雨送三春高柳不藏閣流鶯解就人道心  
看物變時論薄官貧無限扁舟意澄江滿綠蘋

雨宿壇院

杖藜成薄暮亭館坐忘歸微雨洗山月白雲生客衣松槐  
千樹合笙鶴九霄飛自笑塵中老來游此地稀

贈登封葉明府并叔

吏隱名山窟高齋雲氣重翠屏橫少室明月正中峯苔綠  
前朝碣秋清遠寺鐘興來飛舄得何處有仙蹤

再過岑山寺憶程山尊舊同此游

重來新漲急小艇亂中流樹葉春藏寺谿聲夜滿樓  
喧渚鷺報雨聽林鳩不共狂歌客登臨起暮愁

飲汪鈍菴宅

時屏跡謝客  
爲予入郡

不分枉蘭棹重兼開竹扉窮交存白髮小酌坐清暉  
官在還山久書成示客稀儻同吳市隱相傍老漁磯  
別業蘇臺外幽棲何處尋入園松徑綠高枕石湖深  
萬卷供多病千春獨寸心離筵殊造次還擬就遙岑

余澹心追送同舟至惠山

離人逢好友一棹傍林邱遠送同明月相看總白頭  
野橋疏柳卧浦寺亂雲秋信宿傾情話閒心到十洲

寄汪舟次司訓贛榆

憶共西山宿高歌豈宦情一氈連大海五字竟長城  
夜雨

桃花水春風畫角聲憂時休悵望絃誦是平生

時淮徐方  
苦河決

顧甯人關中書至

卜居從汗漫作客古長安抗志遺民在論交直道難  
關川園裏住華岳掌邊看尙有家山夢應知關塞寒  
舊蹟滿西京高談就友生書曾搜孔壁詩已變秦聲  
多難餘身健新編計日成別來頭並白望遠不勝情

始入白岳宿桃花洞天

樹裏柴扉暮不扃仙臺鐙火遠熒熒煙橫谷口虛  
堂白路入山腰古洞青竹葉翻風喧夜雨桃花流水帶春星  
巘岼五老遙相待明日丹梯上杳冥

日照觀海同呂翰公明府

萬里蒼波照客顏危亭天畔更躋攀魚龍欲見空中閣風



雨忽移何處山絕壑浮雲來掌上扶桑倒影接人間憑陵  
愁思翻無際漁父孤帆去獨聞

光岳樓

危樓千尺瞰滄溟泰岱東來作翠屏拂檻寒星晴歷歷侵  
衣銀漢晝泠泠地連朔雪孤城白天入齊煙一帶青尊酒  
未酣人欲散西風黃鵠度空冥

青州道上

草色青青攬轡游馬頭見說古營邱荒村老樹聞鶯少舞  
絮驚沙攬客愁霸氣尙留齊海岱微言誰問魯春秋登臨  
預擬蓬萊閣好倚扶桑到十洲

登岱

羣仙冉冉下青峯迴合虛無紫氣重日出天門當漢時雲

深御帳失秦松雙崖石裂驚龍鬬四月桃開積雪封輦道  
荒蕪民力盡相如禪草且從容

燕子磯和王阮亭

磯頭一望一含情吳楚風帆入掌平山寺樓臺銜岸出江  
村煙火雜雲生東南極目眞天塹鼓角連年動石城今古  
銷沈餘釣艇斷腸重聽暮潮聲

旅寓秦淮解蘭石農部移尊見過

疎柳高梧水閣西使君懷抱向清谿爲言笛步聽歌好自  
喜金樽就客攜畫省風流兼吏隱滄江雲月伴崎嶇清歡  
未覺消長夜銀漢垂垂拂檻低

暮抵西山香城寺懷伯衡

先是相約  
同游不果

蒼蒼絕壁迴龍嵒陟磴攀藤一徑通茅屋數家松葉下山

程十里水聲中天開殿閣迴峯抱日落雲霞半嶺紅正是  
登高時節近故人相望隔江東

汪發若孝廉陽坡草堂

門徑陰森石磴斜城頭山館樹交加雲霞遠色橫千嶂雪  
月寒光俯萬家烏几琴書皆傍竹陽坡風土舊宜茶愛君  
兄弟過從數每歲吟看滿眼花

宿少林寺

夕陽半嶺照松關初地幽棲少室山僧磬自鳴林鳥靜天  
風不動石蘿閒懸巖五乳青冥外古樹三花杳靄間聞道  
折蘆人去遠錫飛常帶白雲還

見宋荔裳遺詩悽然有作

君按察四川會滇蜀反道梗憂憤死

好客平生酒不空高歌零落痛無窮西川終古流殘淚東

海從今少大風國士魂銷多難後離人望斷九原中張堪  
妻子應誰託巢卵長拋虎豹叢

至南旺

客倦南來路河分向北流明朝望鄉淚寄不到江頭

山行

野寺分晴樹山亭過晚霞春深無客到一路落松花

三十六灣

湘陰

湘水行來轉櫂頻迴波蕩漾送殘春低頭錯認鄉園水欲  
喚青莎渡口人

書西山丁道人壁

山豆花開野菊秋隔林茅屋是丹邱客來問道惟搖手隨  
意清泉繞屋流

鐵笛亭

谿光漠漠樹冥冥勝事猶傳石上亭樵唱數聲人靜後松  
風吹出片雲青

晚晴簃詩匯卷四十三終

晚晴簃詩匯卷四十四目錄

朱彝尊

七十二首

毛奇齡

五十一首

晚晴移詩匯卷四十四

徐世昌

朱彝尊字錫鬯號竹垞秀水人康熙己未召試博學鴻

詞授檢討有曝書亭集

王漁洋曰錫鬯文格公之曾孫少達喪亂棄制舉獨  
肆力古學研究六藝之旨於漢唐諸儒注疏皆務窮  
其指歸南喻五嶺北出雲朔東泛滄海登之眾所至  
叢祠荒冢金石斷缺之文莫不搜剔考證與史傳參  
互同異其為文紆餘澄澹蛻出風露於辨證尤精詩  
則捨筏登岸務尋古人傳之風意於文句之外今之  
作者未或先也查初白曰意然竹垞先生以有唐為宗  
入史館其稱詩道最早格亦稍變與人終以有唐為宗  
語不雅馴錫鬯詩道正始之本於少陵而兼以太白之風  
韻故獨為秀出無鄭荔鄉曰阮亭尚書以風雅號召  
海宇一時名流無敢相驂騑者濟河海岱間每以山  
舊田氏並舉為言江南人士亦有漁洋縣鍊不肯人  
刻惟先生體大思精牢籠萬有而澄汰鍛鍊不肯人  
云亦云迄今交游零落壇坫荒涼而新城蘇黃  
屹然為南北二大宗比於唐之李杜宋之蘇黃



詩話竹垞著述最富初刻文類二十六卷入翰林後  
 為騰笑集中八卷晚乃編定曝書亭集四庫提要稱其  
 永嘉詩中以南亭西射堂孤嶼瞿溪諸篇規撫王孟未  
 盡所長中歲以還學問愈博風骨愈壯長篇險韻出  
 奇無窮暮年老筆縱橫天真爛漫惟意所造頗乏翦  
 裁晚景類唐杜陵不免亦不能苛論所編明詩綜里  
 貫之下各載諸家評論以靜志居詩話分附於後隆  
 萬後所收未免稍繁然世遠者篇章易佚時近者部  
 帙多存當亦隨所見聞不盡出於標榜歸愚別裁謂  
 集中詩不分唐宋界限故各體俱備兵長律議論正大  
 格律工整步武少陵送曹侍郎備兵大同諸篇近李  
 北地應是中年之作晚歲俱歸流易前賢緒論茲為  
 允矣齋中讀書十二首足見平生為學宗旨故備錄之

逢姜給事

黃門先生官左掖力欲拔山氣辟易虎豹天關閉九重孤  
 臣血肉徒狼藉東萊蜃市易沈淪南國相逢淚滿巾青鞵  
 布韞江湖外誰念當時折檻人

哭王處士

書信傳初到，銘旌已在途。今來紛涕淚，昔別念須臾。迢遞悲長道，艱難喪老儒。山陽懷舊賦，流恨滿江湖。

遠道將歸客，孤舟返舊林。招魂迷楚水，卧病絕吳吟。夢裏羅含鳥，囊中陸賈金。猶憐別時語，悽斷故人心。

江海飄零日，秦川喪亂餘。淒涼蒿里曲，生死秣陵書。零雨沾青草，高原哭素車。南山桂搖落，無復子雲居。

知己從今少，平生負汝多。人生看到此，天道復如何。流水笳簫曲，悲風薤露歌。王猷竹林在，舊徑不堪過。

落日明丹旆，飄風卷繡帷。途窮偏作客，身老獨無兒。書籍今何託，人琴不可知。高山空有調，回首失鍾期。

相送悲長別，還家慘獨行。流連簡書札，次第念交情。自有篋中作，何難身後名。泉臺應快意，未必似平生。

謁大禹陵

夏后巡游地茅峰會計時雙圭開日月四載集輶櫟國有  
防風戮書仍宛委披貢金三品入執帛萬方隨相古洪流  
割欽承帝曰咨寸陰輕尺璧昆命有元龜自授庚辰籍甯  
論癸甲期清都留玉女惡浪鏢支祁荒度功攸賴平成理  
自宜神姦魑魅屏典則子孫貽明德由來遠升遐亦在茲  
邱林無改列弓劍祇同悲回首辭羣后傷心隔九疑鳥耘  
千畝徧龍負一舟移斷草山阿井空亭嶽麓碑芒芒懷舊  
跡肅肅禮荒祠黃屋神如在桐棺記有之筵誰包橘柚隄  
或守熊羆共訝梅梁失因探窈石遺竭來憑弔處拜手獨  
陳辭

南鎮

稽山形勝鬱岩堯南鎮封壇世代遙絕壁暗愁風雨至陰  
崖深護鬼神朝雲雷古洞藏金簡鐙火春祠奏玉簫千載  
六陵餘劍舄帝鄉魂斷不堪招

遶門山

修途緣廣隰川暝高煙平迢迢前山路落日西林明舍舟  
復登陸慰我巖壑情斧斤山林外白石丁丁鳴危梯懸木  
杪幽谷聞人聲陰晴古壁暗高下蒼崖傾或見山火出時  
聞猿鳥驚平看雷雨黑下視源潭清微風吹素浪日夕沄  
沄生山田足禾黍水石明柴荆何年此幽棲深謝世上名  
無爲在城市戚戚多所營

舟中望柯山

朝光麗華薄清川蕩浮瀾機楫臨江皋流目肆遐觀丹葩

眩重谷素雲冒層巒我行既遲迴顧景多所歡青林翳巖  
桂香風過崇蘭空亭邈孤高修竹自檀欒緬懷古之人知  
音良已難

秣陵

秣陵城闕暮雲封估客帆檣落日逢萬里星霜沙塞雁五  
更風雨掖門松長江鐵鎖空千尺大道朱樓定幾重此夕  
愁人聽鼓角驚心不似景陽鐘

大孤山

兩孤去百里宛在中流半匪獨形勝殊氣亦變昏旦天梯  
鬼斧開廟火神鴉散昭昭雲月輝歷歷明星爛空水旣澄  
鮮浮光亦淩亂飄飄御冷風恍忽度銀漢未有歸與情空  
深逝者歎

度大庾嶺

雄關直上嶺雲孤  
驛路梅花歲月徂  
丞相祠堂虛寂寞  
越王城闕總荒蕪  
自來北至無鴻雁  
從此南飛有鷓鴣  
鄉國不堪重佇望  
亂山落日滿長途

潯陽峽

吳山多逶迤  
粵山獨嶄崟  
壁立千仞餘  
洞壑俯穹嵌  
子午見日月  
朝夕鳴松杉  
天風一以至  
蕭瑟吹江帆  
懸崖答長嘯  
空翠溼征衫  
側聞飛仙度  
遠見浮雲銜  
何當斲靈藥  
坐惜無長鑱

香爐峽

何年香爐峽  
擅此香爐名  
匡廬與會稽  
秀色同削成  
篁徑散彩翠  
溪流澹澄明  
青雲結車蓋  
白日懸霓旌  
孤舟泛容

與百丈紛縱橫人影如沙蟲林林川上行夕陽下長坂猿  
鳥盡哀鳴征途渺何極惻惻使心驚

大廟峽

連山何迢迢迢迢夕陽外我行曾幾時虛舟入青靄崖傾  
斷車箱廟古陰松檜遙見靈旗翻微風響清籟川光與天  
容上下如衣帶纍纍白石明窅窅浮雲晦日夕故鄉心山  
川渺吳會

羚羊峽

泠泠高峽水際曉煙光微一聞征橈發宿鳥皆驚飛浦樹  
旣迢迢山雲亦依依谿迴修竹靜日出行人稀雙崖信奇  
峻屹立如重圍猿猱相叫嘯水石湛清輝遂令游子心萬  
里亦忘歸林棲如可得願息漢陰機

## 五羊觀

中天臺殿倚南溟玉珮雲衣散百靈瘴雨不開煙樹黑驚  
濤直下海門青騎羊舊說朝仙馭銜穀何年降楚庭歎息  
遺墟今寂寞高林空度羽人經

## 越王臺懷古

君不見越山高高越臺古複道逶迤接南武北望山頭徧  
白雲西臨城下環珠浦由來形勝盡高邱萬里天南此壯  
游驚濤暗向扶胥落佳氣晴連鬱水浮憶昔中原逐秦鹿  
五軍失利屠睢戮番君一出王衡山戶將從征入函谷天  
教霸象開南溟宵分東井聚五星龍川縣令起嶺表被書  
移檄馳邊庭聲言三關盜兵至一時按法誅秦吏萬人旣  
築滄陽城千里還開雒王地漢帝當年爲剖符陸生燕喜



出西都冠裳黻結須臾變文錦蒲桃絕世無番禺之交一  
都會因山築臺落天外百丈迴盤信壯觀三時朔望長升  
拜自古羈縻稱外藩誰令市鐵禁關門不見鯨魚重入貢  
旋看黃屋自言尊漢使陳觴更行樂紫貝明犀雙孔雀重  
來錦石已成山歸去黃金遂盈橐一從蒟醬啟唐蒙越騎  
校尉甘泉中是誰僂殺棄繻者江淮巴蜀紛來攻伏波下  
瀨軍三面樓船戈船齊教戰合浦珠崖隸海隅山薑扶荔  
移深殿尉佗城圯夕陽原建德園荒秋樹根虛傳避暑游  
宮闕幾見浮杯出石門木棉花開山雨積鷓鴣嘯處蠻煙  
碧舊井潛移郭璞城離宮半入虞翻宅人事消沈洵可哀  
千秋朝漢餘高臺漢家遺蹟不可問吁嗟乎歌風柏梁安  
在哉

崧臺晚眺

傑閣臨江試獨過側身天地一悲歌  
蒼梧風起愁雲暮高峽晴開落照多  
綠草炎洲巢翠羽金鞭沙市走明駝  
平蠻更憶當年事諸將誰同馬伏波

入景福洞登璇璣臺

紺宇陟旣窮靈域探未竭援蘿巡傾崖  
窺巖辨修碣滅跡超重深拂衣避硨磲  
入窞驚坎習出泉自蒙發洩雲晴未歸  
石火寒不伐吹萬聆天風明兩見日月  
芳塵凝花堂象緯逼金闕陰澗待息心  
陽阿足晞髮歲晏當來游毋令蕙草歇

由香關至玉虛觀遂轉登絕頂

山行不辭勞況非道路長石門敲層阿  
沙草敷陽岡仄徑

既窈窕連峯復青蒼登高睎千里矯首凌八荒飛鳥遺之音埃風吹我裳覽彼終南詩有紀亦有堂亭亭翠旗列宛宛朱鳳翔忘憂豈在邇爲樂誠多方何當啟閭闔高舉朝紫皇

下扶嘯臺陟閬風崖自蓬壺徑汎舟入鐘鼓洞

高寒肆冥搜幽異愜心賞窮梯背樵蘇密徑面篠簜睇後路既迴瞻前渚彌枉緬辭蘇門嘯重作剡溪訪泉石匪自今亭臺已成曩其鏗異短聞無射中奇響偉茲造化功流形信无妄津逮興故超神洲道斯廣懷哉謝人寰歸與授吾黨

峽山飛來寺

花宮蕭瑟暮雲間絕磴藤蘿迴莫攀一自高風留帝子至

今修竹滿空山，澄潭犀去沈金鎖。古洞猿歸帶玉環，此夕登艫渾不寐。更教沿月弄潺湲。

謁張曲江祠

峻坂盤神樹，陰崖鑿鬼工。芳塵羽扇冷，春燕玉堂空。不覩關門險，誰開造化功。經過遺像肅，千載嶺雲東。

題南昌鐵柱觀

丹甍縹緲麗層城，鐵柱縱橫鍊紫清。陰洞蛟龍晴有氣，虛堂神鬼晝無聲。游人自愛登高賦，仙吏仍兼濟物情。雷雨忽愁天外至，江湖元在地中行。

喜羅浮屈五過訪

春風蝴蝶飛綠草，南園徧知是麻姑。五色裙羅浮山下，曾相見開門一笑逢。故人遠來問我桃花津，若非綠玉杖定

跨黃麒麟不然出入京雒一萬里何爲布素無緇塵相知  
樂莫樂不用金箱圖五岳況今天地多戰爭赤城華頂風  
煙驚山陰道士不得見四明狂客誰相迎由拳城南春可  
惜竹石如山水千尺從此扁舟范蠡湖長歌來往裴休宅

顯皇帝大閱圖爲吳金吾國輔賦萬歷初太師張文忠公居正秉國勸

駕大閱時兵部尙書吳公兌實典禁旅俾圖以傳  
子孫錦衣都督同知國輔尙書曾孫也出以觀客  
圖長三丈餘內自官闕外至陵寢極於沙漠止焉  
絲是萊陽宋琬作賦南昌王猷定作記而彝尊作  
詩以述之

神廟垂衣日江陵總百官揆文先奮武慮亂本居安殿上  
蕭何履朝中貢禹冠孫通明禮樂方叔莅師千駕馭英雄  
在超騰士馬驩車徒看翼翼禁旅尙桓桓畫史眞能事披  
圖得鉅觀丹青榮顧愷宮室擬胡寬歷歷開城闕高高疊

井幹虛無凌倒影縹緲結重欒太液波還靜長楊露未乾  
妝樓原自鎖圓殿不禁寒仙仗移平樂霓旌擁上蘭忽驚  
千騎並旋訝六營團作氣陳金鼓前驅建玉鑾輕雲承翠  
蓋麗日表朱竿遂列堂堂陣爰升將將壇小侯班四姓大  
閱用三單紫燕雙絲絡花驄七寶鞍呈能羣角觝教射集  
星弁觶飲籌無算饒歌曲漸闌行知塵冉冉歸想佩珊珊  
遠勢工尤極平原繪更難蕭疏連板屋迢遞出峰巒百里  
生毫末諸陵望鬱盤薊門無堠火函谷有泥丸元老謀猶  
壯諸孫手澤完錦題探篋笥湘簟展琅玕對此成希覲因  
之感萬端雨煙飛蜀錦霜雪皎齊紈賦愧王延壽謠同梁  
伯鸞儀章長在目珍重歲時看

留別董三

隱

離堂翦燭重燒燭深夜他鄉說故鄉作客蕭條官舍下逢  
君歌哭酒壚傍明朝分手仍南北後會相期各渺茫長路  
烽煙驚海甸亂山風雨暗河梁

于忠肅公祠

昔在狼山下軍書犯近坳六師輕朔漠萬騎失雷霆土木  
塵長滿龍蛇歲不甯豆田沙浩浩黍谷路冥冥濟世須元  
老長材總四溟從容持國計指顧悉兵形瑕呂安羣議劉  
琨表外廷嗣王仍歷數高廟有神靈旣罷金縢款無煩白  
馬刑北轅旋翠輦南內啟朱扃命已甘刀鑊功真溢鼎銘  
春秋隆代祀俎豆肅維馨一自輶車至難期堠火停遺墟  
愁戰伐大樹日飄零碧草空祠長黃鵬過客聽霜鐘沈曉  
月風牖繞明星卞壺誰修墓巫陽數降庭讖還思雨帝碑

欲墮江亭遠水澄湖碧流雲暗壑青千年華表鶴哀怨此  
重經

吳山望浙江

一峰高出萬松寒磴道虛疑十八盤近海魚龍吹宿霧中  
天日月轉浮瀾風帆岸壓明珠舶仙樹花濃白石壇舊是  
錦衣行樂地江山眞作霸圖看

寒夜集鐙公房聽韓七山人彈琴兼送屈五還羅

浮

韓生燕市來夜向招提宿本是悲歌擊筑人援琴爲鼓清  
商曲安絃操縵夜三更良久徘徊不出聲坐使閒心遠方  
聞逸響生商風泠泠七絃徧天馬空山忽不見石上爭流  
三峽泉平沙亂落蕭湘雁聞道清商固最悲不如清角更



淒其一彈試奏思歸引再轉重愁雙燕離此時晨鐘猶未  
撞月露霜華滿深巷四座無言歎息頻籌鐙欲滅風升降  
羅浮道士思幡然忽憶朱明舊洞天種得梅花凡幾樹泥  
成丹竈已千年雲山告歸從此始四百三十二峯裏入海  
能馴海客鷗攜琴便駕琴高鯉

送曹侍郎備兵大同

司農論議朝端重副相聲名輦下聞豈意尙煩西顧策翻  
教暫領朔方軍河邊遠道人千里天外鄉書雁幾羣到日  
關城春色早李陵臺畔柳紛紛  
關榆蕭瑟二庭空堠火平安九塞通往日連師驚朔漠只  
今市馬互西東黃河天上三城戍畫角霜前萬里風知有  
馮唐論將帥不令魏尙久雲中

將之永嘉曹侍郎餞予江上吳客韋二丈爲彈長亭  
之曲并吹笛送行歌以贈韋卽送其出塞

韋郎舊隸羽林籍曾向營門教吹笛不聽吳中白雪音定  
呼鄴下黃鬚客平原相見轉相親置酒誇君坐上賓下若  
尊疊朝未罄東山絲竹夜還陳閒來坐我花間奏玉洞飛  
泉嚮巖溜古調多傳關馬詞新聲似出康王授問我東行  
到海壖日斜江上慘離筵還將北雁南飛曲催送錢塘楚  
客船船人搥鼓津頭泊紅葉千山富春郭忽作邊秋出塞  
聲江楓岸柳紛紛落哀絃促管不堪聽賓御聞之亦涕零  
挂席遠移嚴子瀨看山直上謝公亭聞君欲問雲中戍雪  
消飲馬長城去廣武營邊折柳時黃瓜阜上題書處司農  
舊是出羣才此日征西幕府開試向尊前歌一曲梅花飛

徧李陵臺

金華道上夢游天台歌

吾聞天台山高一萬八千丈石梁遠挂藤蘿上飛流直下  
天際來散作哀湍眾山響燭龍銜日海風飄猶是天雞夜  
半潮積雨自懸華頂月明霞長建赤城標我向金華問客  
程蘭谿谿水百尺清金光瑤草不可拾夢中忽遇皇初平  
手攜綠玉杖引我天台行天台山深斷行路亂石如羊紛  
可數忽作哀猿四面號青林綠篠那相顧我欲吹簫駕孔  
鸞璿臺十二碧雲端入林未愁苔徑滑到面但覺松風寒  
松門之西轉清曠桂樹蒼蒼石壇上雲鬢玉洞展雙扉二  
女明妝儼相向粲然啟玉齒對客前致詞昨朝東風來吹  
我芳樹枝山桃花紅亦已落問君采藥來何遲曲房置酒

張高宴芝草胡麻迭相勸不記仙源路易迷樽前只道長  
相見覺來霜月滿城樓恍忽天台自昔游仍憐獨客東南  
去不似雙溪西北流

謁劉文成公祠

草昧經綸日英雄戰鬪年真人淮泗起王氣斗牛躔命世  
生良弼卑棲役大賢一官齊簿尉千里正戈鋌記室依袁  
紹飛書謝魯連神鷹思飽掣威鳳必高鶩漢祖除秦法周  
王卜渭畋廟堂才不易束帛禮宜先遂有君臣契能令帷  
幄專南征頻克敵北伐旋摧堅王會收三統軍謀出萬全  
河山分帶礪冠蓋儼神仙未辟留侯穀長辭范蠡船麒麟  
當日畫竹帛後時編一自邱陵改重愁歲月遷隆中猶故  
宅縣上少封田舊俗還祠廟清歌入管絃黃金遺像蝕鐵

券幾人傳古瓦甌，  
黜落荒庭檜柏圓。  
蛛絲虛寢，  
買鳥跡斷碑眠。  
想像陰符策，  
沉吟寶劍篇。  
前賢餘事業，  
後死尙迍邐。  
去去辭粉梓，  
栖栖到海壖。  
空林多雨雪，  
哀角滿山川。  
玉帳無遺術，  
蒼生久倒懸。  
想留一黃石，  
相待穀城邊。

七夕

遠客清樽夕，  
虛堂玉露秋。  
關山頻北望，  
河漢已西流。  
葉落他鄉樹，  
砧催故國樓。  
今宵看織女，  
未必詣牽牛。

雨渡永嘉江夜入柵溪

落日下崦嵫，  
飛雨自崇墉。  
駕言出北郭，  
汎舟橫東江。  
近岫旣凌緬，  
遙岑亦濛籠。  
蔥青水竹交，  
乃有樵徑通。  
潛虬寒載蟄，  
海鷗夕來雙。  
顧望雲葉開，  
張星昏已中。  
荒岡響哀狖，  
枉渚遵輕鴻。  
故鄉日以遠，  
川路靡克終。  
寄言薜蘿客，  
歲宴期。

來同

送孫處士默還黃山

蕪城客散亂烏嘯別業黃山路不迷後夜相思秋色遠月  
明三十二峯西

出居庸關

居庸關上子規嘯飲馬流泉落日低雨雪自飛千嶂外榆  
林祇隔數峯西

土木堡

平蕪一簣狼山下九月驅車白霧昏到眼關河成故跡傷  
心土木但空屯元戎苦戰翻迴蹕諸將論功首奪門早遣  
金繒和社稷祠官誰奉裕陵園

宣府鎮

高城西北控燕都吹角清秋落日孤尙憶武皇巡玉塞親  
從鎮國剖金符宮槐御柳今蕭瑟虎圈鷹坊舊有無邊事  
百年虛想像誰誇天險塞飛狐

雲中至日

去歲山川縉雲嶺今年雨雪白登臺可憐日至長爲客何  
意天涯數舉杯城晚角聲通雁塞關寒馬色上龍堆故園  
望斷江村裏愁說梅花細細開

贈周參政

周君北地推風雅幾載栖遲白門下四壁蕭然竟罷官知  
君亦是悠悠者匹馬西來訪故人相逢師友更情親自言  
潯暑辭堂邑不覺辛盤換早春春晴風日官齋迴翰墨于  
今數公等畫品眞同顧愷工隸書遠見鍾繇並貽我梅邊

索句圖江南春思到平蕪蒼苔濁酒尋常得冷蕊疏枝何  
處無紇千山高凍飛雀健步移來總蕭索不見黃鬚細細  
開惟愁白雪紛紛落蘇武城邊送別遲桑乾河上已流澌  
遙將南浦離人曲迸入西征橫笛詞憐君此去壺關道盍  
簪到處逢迎好澤潞三時芳樹多江風五月歸帆早滄洲  
萬里憶田廬流水柴門今尙虛卜鄰儻就移家約來共梅  
花溪上居

雁門關

南登雁門道騁望句注巔山岡鬱參錯石棧紛鉤連度嶺  
風漸微入關寒未捐層冰如玉龍萬丈來蜿蜒飛光一相  
射我馬忽不前抗跡懷古人千載誠多賢郅都守長城烽  
火靜居延劉琨發廣莫吟嘯扶風篇偉哉廣與牧勇略天



下傳時來英雄奮事去陵谷遷數子不可期勞歌爲誰宣  
嗷嗷中澤鴻聆我慷慨言

晚次崞縣

百戰樓煩地三春尙朔風雪飛寒食後城閉夕陽中行役  
身將老艱難歲不同流移嗟雁戶生計各西東

紫藤花下醉歌同查上舍弟

刪璵賦

客舍紫藤長數尋  
馭蔓年多半枯槁  
往歲丰茸莖太密  
花事去春翻草草  
今年二月呼園丁  
三百銅錢費除掃  
雖然芟後花較遲  
漸見含苞同蔽腦  
檐牙朽株換棚格  
井牀新汲傳栲栳  
聚歎低垂香細細  
游絲不動日杲杲  
鉤簾忽驚啁雀去  
仰面生憎土蠶抱  
越州老酒吳船來  
小榼偏提恣傾倒  
頭銜久矣脫朝簿  
那問鼙鼙鼓昏早  
惜哉筋力日已

疲惟有花前不知老停杯還憶故鄉路亂水穿沙入裴島

千章古木藤纏身飄落繁英滿衫襖明年期爾橫漲橋

舍上

所柔艣嘔啞撥萍藻綠陰共聽黃栗留醉卧楸頭船更好

爲錢給事

晉錫

題王給事

原祁

富春大嶺圖

記得山城水閣添畫眉聲裏晝垂簾還憑同省王郎筆暝  
翠浮嵐五尺練

富春江上雨溟濛兩岸花開躑躅紅髣髴舊游如畫裏一  
帆曾轉釣壇東

出都王山人

翬

畫山水送別

王郎五載一相逢寫出雲巒別思重髣髴攝山風月夜秋  
窗同聽六朝松

寄陸侍御

隴其

主恩先後逐臣還  
羨爾幽棲泖一灣  
想得著書風幔底  
桂花如霰落秋山

光孝寺觀貫休畫羅漢同陳恭尹賦

貫休手寫一十六羅漢  
其二乃在南海訶子林  
昔游真蹟未得見  
念之三十五載縈人心  
白頭重作嶺南客  
故人期我虞翻宅  
僧廊亂後花木猶  
瓏璫薤菜春生滿  
池碧循廊轉入精廬深  
一幅居然挂東壁  
古綃尙白石轉青  
恰於石罅安疏櫺  
一僧俛首力寫經  
自準以下祇半形  
芬陀利花貝多葉  
櫻欄筆管毛猩猩  
不知金天之西何處得  
不覩母乃昆吾玉  
切新出礪一僧卻立  
侍巾餅靜如沙鷺翹  
涼江窗鐙不翦信  
明滅杪櫺樹底風  
泠泠窗前千歲老  
猿拱雙臂平  
扱兩肩聳筍鞵  
桐帽木葉衣  
想見霜濃寒到踵  
精誠

能令感金石何況羣生知怖恐禪月師流傳三絕畫書詩  
詩編巨岳集書有姜體遠本周之史籀秦相斯未若畫品  
更崛奇卽如此幅遠出意匠表或疑入定眞容髣髴親見  
之不然調鉛殺粉能爾爲詞林僧神物藉汝能世守不見  
宣和舊譜遺蹟久云亡豫章西山雲堂院中亦何有我欲  
賺汝去莫飲我缸面酒我欲奪汝歸玉鴉又不在手世間  
豈少珊瑚鐵網珍珠船自今貯之伏梁閣檻庶可全

嶺海將歸梁吉士

佩蘭

載酒邀同屈

大均

陳恭尹吳

韋王準

陳元基梁

無拔

季煌

燕集五層樓席上分

賦得會字

飛樓壓高城人天納萬籟登臨信可娛矧與羣彥會吉士  
澹蕩人偕行屏軒蓋論交半簪笠雜坐緩巾帶樽中酒如

泉海大魚作鱸款款話別悰迢迢念歸旆於焉感昔游茲  
樓在曉靄凝思躡丹梯興發不可奈惟時建雄藩自比夜  
郎大邸中鑿園池巧匠恣雕繪水亭擬舟梁山木徒樅檜  
長姣羅美人管庫斂文貝因之設厲禁游者必鉗鋏一閉  
金獸銀廿年委榛蒼修蛇穴其中妖鳥叫其外雖免劫火  
焚終遭颶風害人事戒滿盈天意惡侈怵六師一以移漢  
將齊下瀨劉王舊花塢金粉盡淘汰今來縱游觀足以動  
深慨觴罷復凭闌遠目豁矇眊祝融方司南尉陀臺占兌  
萬井鬱參差百谷互陽昧人影數沙蟲林梢亞蓬艾我非  
雲中君何緣出塵壻少陵有遺詩將老斯游最

樟灘

建溪饒驚瀨樟灘最巉險顛波勢欲下亂石故磨颺窪坳

碾作渦刻露圭就琰我衰憂患多過此容色斂篙師凝睛  
立尺水巧迴閃鏗然矢投壺狎恰不誤點輕舟恣一擲縱  
若鳥脫罨以茲推物理遇境適夷險人或發禍機忌者思  
盡掩揚瀾沸平地鑿空架崖厂由來人背嚙未必鬼神貶  
濟盈軌易濡忠信幸無忝習坎入坎凶旣出夫何玷浮海  
桴可乘舟楫況剡剡

二月朔查山探梅集六浮閣分韻得覃字

查山一卷石太湖匯西南梅花幾百萬亂插如著簪我來  
微雨後盡坼霜苞含橫披谷錦繡倒映天蔚藍高臨銅官  
井下者菖蒲潭鹿眼編疏籬鹿胎糝空岾卑枝或壓帽瘦  
蒂恆飄衫粉蝶羽翻飛白龍須盤鬚曩時李先輩邱壑性  
所耽過之不能去思結小圓庵點筆寫爲圖買山付虛談

清河有一老於此開徑三詩壘黃篋樓生壙金粟龕偶占  
絕勝地戶戶圍重嵐漁洋峙厥左層波激滄溟其右浮者  
六一一同眠蠶所憾漱浦隔未得窮幽探徒羨漁子艇揚  
帆捉羸蚶張郎敬愛客託契來僑鄰園蔬進香飯家釀發  
新柑蟛蜊列瑣細橙橘分酸甘主賓迭相勸力飲忘身酣  
是夕陰復晴淨洗雪疊疊花光暝逾蒸四坐聞醯醢牽吟  
共闕韻語笑吳越參酬和繼沈范少長齊羅聃禮從野人  
野嗜比貪夫貪昂參橫醉後各各猶研覃回憶平生游斯  
集樂且湛擬留信宿居懶上白竹籃

齋中讀書

周官掌三易以通天下志卦名或不齊旅占本一致豈有  
先後天似離異方位斯言僞且堅足以亂神智演爲方圓

圖申以河洛義儀象卦已陳相錯六十四圖中迭相生十六三十二請問安樂翁正名名焉寄

太極非有象一元氣渾淪陰陽至精數義由道士伸列圖

自下上三五理具陳

陳子昂詩太極生天地三元更廣與至精亮斯在三五誰能微義見道家

洞真元

番番希夷叟以此勒貞珉元公一丁倒遂爲席上

珍

陳搏無極圖倒易即爲周子太極圖

後來費朱陸往復辭紛綸仲尼不可

作誰與別僞真

書名達四方掌之周外史曷言乎書名毋乃小序是馬鄭

注漆經大義已及此古文雖未見序先暢厥旨云何宋諸

儒深文共排毀

書序非孔子作其說始林之奇

吾聞國史言序書自孔子

哀哉秦火後未亡亦僅爾苟屬聖人言亦當存其似不見

小戴文禮家以取士何獨詩書序攻者後先起



九疇一五行洪範義先具伯鯨一汨陳維帝乃震怒啟賢  
能繼禹天罰行有扈桑門易地風其說本舛互奈何洛下  
儒侮聖不知懼用三革其二變一成百悟既與洪範殊甯  
免彝倫敦百世而可欺君子亦有惡

孔門善說詩子云商起于流傳大小毛授受大小序縱有  
齊魯韓見之色斯阻夾漈一後生攻以烈火炬先儒誤聽  
信鑿枘生齟齬微言忽中絕大義不復舉聞人左邱明著  
書秦相呂其言雖近誣其事頗足取國僑賦褰裳晉爲退  
師旅木瓜美齊桓情豈係男女詩教厚人倫誨淫何獨許  
可怪上蔡師魯齋王氏爲爲力亦太鉅芟棄鄭衛篇竄改  
雅頌所王氏擅刪鄭衛諸篇又退名南野有死腐誰爲辨  
異同復遵箋傳語

男女一相悅情迫莫自持不聞桑中契先以定情詩國史  
明得失輶軒別醇疵如何厯鄭衛專錄淫人辭雞鳴風雨  
夜奔者亦可危執袪遵大路豈不畏人知邱中有麻麥兩  
雄共一雌雙雙李樹下甯免相詬訾立言詎可訓說者宜  
再思無邪尼父教用告童子師

詩亡王迹熄百國有春秋魯叟乃筆削寶書肆旁搜晉乘  
楚檮杌鄭志亦見收斯爲天子事邦國合九州大書王正  
月恐疑於孟陬胡氏逞私智謂以夏冠周豈其一布衣斧  
鉞威諸侯美惡同其辭此言尤謬悠當其在講幄君臣意  
綢繆經義月經進諷諫同轉軸是時十將存可復二帝讎  
奈何戒黷武惟知安是偷得毋檜所薦知己士當酬流傳  
誤後學乖舛難悉糾曷不廢其書述事準左邱

素王六經外論語其總龜紀者六十四義取春秋辭同門  
有不善一一具書之由求予亢察言失不可追揆諸朋友  
義情得徇其私甯形弟子短但以尊先師試觀孟子徒克  
丑亦若斯後儒不曉事吹毛務求疵倡論輟從祀平反者  
爲誰不若鄉愿人非刺無可施警宗祀此輩眾口庶不訾  
吾思屋上烏愛由丈人推云何七十子一眚罷其祠何年  
復舊典俎豆敕有司

漢士守一經其義或駁踳眞儒起北海卓哉鄭司農博綜  
六藝旨叩之等木鐘於時內外學罔不羅心胸用以釋儀  
象明堂暨辟雍初非尙怪異專一譚魚龍緯書河圖  
魚龍最怪至於  
五帝名亦惟祀典從德業旣日尊弟子爭扳逢黃巾拜車  
下後儒翻不容一朝輟栗主俎豆何由供嗟彼黎邱鬼謂

通也乃以祀瞽宗

秦延君說書敷文太支蔓堯典僅一篇爲言且三萬博士賣騎驢亦費三紙券吾思吉人辭終與躁人遠辭苟足以達其義自繾綣勿狗買菜求第抒心所願不見陸士衡才多反爲患

詩篇雖小技其源本經史必也萬卷儲始足供驅使別材非關學嚴叟不曉事顧令空疏人著錄多弟子開口效楊陸唐音總不齒吾觀趙宋來諸家匪一體東都導其源南渡逸其軌紛紛流派別往往近羈鄙羣公皆賢豪豈盡昧厥旨良由陳言眾蹈襲乃深恥云何今也愚惟踐形迹似譬諸芳蔗甘舍漿噉渣滓斯言勿用笑庶無乖義始

羣雅日凋謝後起靡有涯奇觚累百人各自名其家吾衰

明倫彙編 家範典 四  
尚有志道古閑諛邪有明三百禩攬秀披春華青田與青  
邱二美洵無瑕吾鄉數程貝雙珠握靈蛇自從永宣來其  
辭正且葩泊乎嘉靖季七子言何夸鉤金縱可揀莫披黃  
河沙一咻眾楚和是後尤卑哇先公聞馱舌頓生亡國嗟  
先太傅初聞袁中郎鍾伯敬論詩  
歎曰安得此亡國之音慘然不憚吾欲返正始助我者誰  
邪

送張士琦令永新

春草烏斯道長州陸子餘由來循吏傳頻見永新書送爾  
之官去牽絲製錦初秋山日蒼翠詩卷共清疏

謁泰伯廟

沮漆尋源合江蠻相土弘古公遺哲嗣內傳有明徵肇迹  
貽謀遠先幾脫屣能帝心惟季度祖武得昌繩句曲誅茅

始衡山采藥曾屈伸等龍螭游息喻鷁鵬三讓聲何忝羣

黎愛莫懲稻田占樂歲泰伯園田城內瓜瓞啟新塍冽井深堪汲

高塘近可乘謳歌頓洋溢獄訟省侵陵化被仁風厚經傳

至德稱宋徐偁請更論語名魯經玉興初弗顧黃屋詎難勝陸雲碑獄訟載歸軀

歌屢請能舍玉興之賈永襲皮冠之迹自鎬宗盟重維南庶績凝命圭還作

伯端委豈無朋節孰千秋並名將萬代矜苻子太伯將讓國語其傳曰王

欲吾嗣一國之事吾其羞之吾問世家倫序定人表上中

應漢書古今人表泰伯仲雍均居第二等地紀吳甄胄見陸廣微祠沿革永

興到門帆葉卸陸龜蒙詩讓王倚郭殿檐層行潦蘋長薦

平墟墓未朋友于同一廟皮曰休詩一廟爭祠兩讓君棲止必雙憑熟

食均遵豆文身判股肱獨存冠黼辱不散髮鬚鬢史記索隱引世

本文雍是熟食漢字熟哉遜位翻追王浮家乃誕登典儀

咸秩久齋宿有司恆芭舞經春演靈旗練日升官橋行坦

坦

近廟有至德橋

社鼓奏鑿鑿霸業諸孫歇豐碑異代增斗牛含

氣象烏兔信環經議禮邦人懈彌文俗吏憎漸疏胞與翟

下遣簿兼丞畫繪添奇鬼

潘凱記祠兩廡下土妖木魅詭形罔象編氓勾福膜拜乞靈

牲醪減舊秤但令巫史祝罕覩蕙肴蒸斷礎方花溼空廊

蔓草芳青蟲晴挂樹蒼鼠暗窺鐙邇者鳴鑾至恭惟嘉惠

承爲章倬雲漢題扁照枒梭過客爭趨謁其誰免戰兢杏

梁浮震澤粟主配延陵墜典勤分掌

同時范文正程明道宗忠簡諸祠降御書

扁額恩言盡服膺法施民矢報終古潔銅甌

寄訊龔御史

翔麟

江橋卜築意麤安聞道出居十畝寬不使車塵喧戶外儘  
容山色到簷端鐙前綠酒雙魚洗雪後紅衣一釣竿料得

時巡春有信種花應許上樓看

近年每逢車駕巡幸一至杭州

手奇齡原名姓字大可一字于一又字齊于別號河右

又號西河又有僧彌僧開初晴秋晴晚晴春莊春遲

諸號蕭山人諸生康熙己未召試博學鴻詞授檢討

有西河集

施愚山曰大可近體多新語不作淹熟樂府五言古  
哀情促響徘徊無端其騷之苗裔乎七言古似  
識率多古音其長吉王建之間乎鄭荔鄉曰以  
骨幹豔彩莊而不重宕而不佻令人於千載後重  
神龍景雲風度阮芸臺曰西河檢討詩咀含六朝  
三唐之勝沈博絕麗窈眇情深其七律如三月暮  
行海岸兩年寒食渡麗江東又歲暮他鄉還作客  
春來何處不思君天然湊拍唐人中最近李願  
詩話西河天才詠麗詩多作興而感然格律嚴背韻  
尚思力亦沈中年以前所作豪宕哀感多見性情通  
籍後莊雅近臺閣體意境一變要皆一守唐格不作  
宋以後諸集中存詩既多自云剛應者十九宴游者  
殆未觀西河之深



讀史詩

張生本文孺夜起受簡編忽從游俠行破產思報韓志意  
人不達物鬱何由宣一朝風雲生帷幄進讜言持籌并握  
箸所至無拘挺當其家居時游戲商洛間平交結耆舊偉  
製裁衣冠辟穀散暮氣刷芝當晨餐貧賤可肆志富貴難  
久安甯負平勃交勿棄園綺歡遐哉赤松游豈爲求神仙  
蘭成煙霞姿倜儻超等倫少小作鈔撰落筆如散銀並使  
嘲鸚鵡同等摩麒麟池臺紹河曲鐘鼓宴洛濱太平三十  
載總是梁朝人豈知蒼鵝飛頓令玉馬湮朱桁撤單舫青  
袍蔽長津庶望下亭旅重遘南郡春如何走秦關別館留  
孤臣三戶旣已盡七葉誰見親從此東海鳥長作西都賓  
陽春方遞代去故當就新寒暑有時盡日月無返晨臨都

哭三晝繞屋步百巡豈不被顯爵亦旣叨殊恩無如慕鄉  
井惠好難重陳生逢亂離世老作異代身江南草長時回  
望情彌殷枳橘豈秦產夷齊本商民一吟思歸辭淚下霑  
衣巾

重經上江過小孤山望高良作

晨颺解流潮朝暎圻遐沚中流辨孤嶼相越尙百里流峭  
去榜逆帆迫來洲駛忽泊斗巖下遂至洪澤裏三江檐前  
期九派殊昔理矚異物不延時遷景爲徙滌水掬流清舉  
花摘葉委羈孤泛無常流浪詎有已甯當越前峯去逐高  
良子

奉召赴都經泰嶽遙望有作

朝日泛暘谷孤光動天門鴻濛啟青蒼仰見喬嶽尊鬱若

灝氣接下與浮雲騫羣峯爭嵯峨拱列同星垣我欲凌絕  
巘俯視周大寰奮迅鮮羽翼帆幟難攀援從來聖神出升  
陟柴以燔五王覲國后三觀窺河源今適遘王會將策明  
堂文下詔召博士因之及公孫自笑圭筆士敢爲封禪言  
神功發眇聽博議開渾元但當入林邱揮手長松間

夙昔愛天孫層霄踰雙足俯仰志不遂高卧滄海曲結念  
周八荒扶輿久脫輻垂老始被徵一憩梁父麓崇巖倚重  
雲白日繫匡谷欲吸沆瀣漿顚額漸滿腹我有雞斯乘躡  
嶠如駕陸入林招洪崖望海誚徐福折取東峯枝間與夸  
父逐厯險理自明升遠象以矚何爲盼修途展轉愧寥廓

送李檢討予養還山

招弓下中山葺屨朝上京公車何崔嵬所藉高世名志氣

本超卓文藻亦縱橫誰言紫閣翁少小無宦情至尊重良  
會召見開延英食以朱貝杵沃以碧筍羹給札令呈藝轍  
落無弱營因之授冊府入署承明庭夏雲方南馳夜火將  
西傾一旦上省養孝感動聖明銜軾謝京邑衣錦投鄉程  
祖帳各擊袂反若千里行人生有初服亦欲奠所貞何爲  
坐拘牽闕志徒怛怛

園鑿不受枿樛枝豈爲輻況有終南行白華蔓空谷曾參  
著兒冠虞氏就養屋渴借桑門瓜甘懷洞庭橘昔有捧檄  
生色喜逮親育今我亦何爲但指風與木蓬池畜嘉魚得  
爲親釜熟迎養曷不可遽爾返邦族白衣雖改繡披之當  
萊服碧山張學士當此悔解幙天涼賣漿稀官邸日不足  
臨朝思貽鞭無馬堪競逐但詠南陔詩雙淚下簌簌

太華有佳氣乃在龍門山千載啟石室一若通武關盤岡  
與繡嶺隱者藏其間況復踵靈異於此產馬班當今居史  
箴疇職筆與刪翳眾多匠手而予猶汗顏維彼榮門子高  
踞蘭臺端慷慨忽棄置躑躅誰躋攀柱下去一宿撰事留  
五難有論責韓愈無書報任安新秋坐林薄仰看飛雲還  
窗通紫微遠戶傍太乙寒日月過欄隙晨夕躬庭餐視此  
三寸擾何如一日閒予有湖上業澁漱通周官思以割一  
曲未敢徼聖歡橫門出祖道藉藉皆來觀緬彼前史賢相  
顧增長歎

打虎兒行

禹州民朱兒救父打虎史使  
君廷桂獎勞之予識之禹署

打虎兒乃在汴梁之禹州禹州城外朱家樓小兒十一隨  
父耕深林有虎斑毛成颺颺黑風吹草根乘風攫人誰敢

櫻小兒不識虎乃亦聞虎名虎來小兒怖欲嘵掀脣見虎  
銜父肢咆哮草際風來吹兒嘵向風不得父把杙打虎截  
虎路三尺童子五尺杙打虎落毛傷虎臆虎驚顧兒舍父  
逃深林風草皆無色禹州刺史呼小兒裹之以帛餽以糜  
予時在署識兒面耳髮穉弱眞兒嬉問兒打虎虎何似舉  
手張齒作虎勢假虎隱慢恐小兒小兒復怖將嘵歸當時  
見虎得無怖此事我亦昧其故禹州刺史省得知是日小  
兒知有父男兒七尺傷父心天寒辭墓行求金安得棄鋏  
抱長杙與之同日還深林我所思打虎兒

陳州村人或賦上陽白髮人者毛甡過聞而感焉

河南河北不種麻上陽宮中無好花玉溝流水載花出從  
此宮牆不能入宛邱東路桑落村漂流近在村東圍黃門

持鵲晚歸寂公主望鄉朝負暄西山盜賊走春電花落重  
飛舊巢燕舞鷺翻垂藥宿衣漚麻添作西宮線金輿入蜀  
未得歸道傍不用傷蛾眉上陽白髮誰家賦能使傍人雙  
淚垂

登白鷺洲值施使君留蕭江有懷

石陽城邊白鷺洲萋萋碧草環洲流層樓百尺俯寒潦有  
客獨登樓上愁樓前寂歷眾山暮萬里江流自來去天半  
橫吹蘊浦帆雲中恍辨虔陽樹我來眺望九日餘芳洲猶  
採紅茱萸遙山不斷故鄉雁沿流時羨清江魚故人乘興  
久舒嘯千載南樓鮮同調看月甯分佐史牀臨風空著參  
軍帽相思渺渺縈素波秋花開映波中螺凭欄欲作登樓  
賦不見夫君奈若何

姜堯招登香爐峯絕頂同姜十七廷梧商二徵說

秋山翠裊海日紅浮暉倒映金芙蓉蒼崖負杖招羽客攜  
我直上香爐峯楓林黃葉下幽壑杖底風吹草衣薄石屋  
高看洞鳥翻橫梁斜度山花落秋空望海海色飛赤城萬  
里煙霏霏越王臺上青烽起夏后祠前白雁稀玉函金簡  
探難得況蹈嶇嶇未曾息北谷空標承露臺南還竟負淩  
風翼蒼崖四顧意氣開吹笙跨鶴眞仙才何年乞汝盈箱  
藥共俟安期海上來

堯號蒼崖子  
時修玄學

同王徵士聽楊太常彈琴篇

毛杜未識楊太常亦未

士每稱太常通明音律尤善彈琴崇禎十六年用  
軍功轉爲太常官使令正樂當曰五聲乃亡角民  
流至耳所攜有二賜琴一爲唐開元年供奉樂器  
祕保勿彈時取他琴操數章或出涕徵士有詩十  
篇和曰

同也



成連入海不復返人間尙有雍門周呼天搶地抱焦木一  
鼓再彈雙淚流晉侯清徵召祿膾楊氏宮亡失行在五音  
升降得喪殊何事民流角聲敗蕭郎左衛本戎伍能定明  
堂五行舞誰憐故器抱殷遺遽使新聲寫淇浦開元供奉  
燒尾琴上皇賜比雙南琛梨園旣散海青死但留篋底空  
沈吟當年大合駕象輅尙對皇娥鼓瑤素鼎湖龍去竟不  
還自抱烏號哭晨暮毛姓家畜潞國絃諸王頌在崇禎年  
欲遺太常共搏拊天涯修阻思茫然從今大雅日淫漫莫  
遣風流使中斷他日相逢袁孝尼願得先傳廣陵散

柳花歌寓蕪城作

春風濯濯江南路吹過邗關到瓜步邗關三月春草長市  
樓大道怨春陽陽春初開日杲杲大道花飛一何早清明

漸近細雨來繞樹游絲墮縹緲游絲縹緲繞如霧綰入隋  
隄柳條住隋隄柳色青瓏璵娓娓流鶯曉不去流鶯曉處  
停玉鑣依依拂面盡長條揮鞭旣度紅欄曲驅車還上綠  
楊橋紅欄綠柳心斷絕隋苑隋隄有離別新聲三疊何處  
吟弱線千條倩誰折可憐草青及春暮可憐綠柳低還仆  
青樓曳翠縈酒壚白馬連錢繫歸渡低枝毵毵接長坂高  
枝蓬蓬白花滿茫茫飛雪繞去遲冉冉輕綿冒來晚翩隨  
晚蝶冒朱花緩向春煙拂玉鴉幾時飄飄落西苑幾時流  
蕩去南家南家西苑兩相棄流蕩飄飄日顚顚春風吹去  
不上天春燕銜將復垂地初翻積雨障輕塵更度妝樓裊  
素茵滿眼離披不知處愁殺東西行路人

宣德審青花脂粉箱爲萊陽姜仲子賦

君不見宣皇宮中脂粉箱青花素瓷出上方陶模範埴好  
形像燒胚燿膊非尋常曼身穴腹判兩截一道坎中周四  
旁融脂淪粉恐膠結澗漩複壁流溫湯宛若麗華鬪妝罷  
宮溝淺膩縈苑牆何年此物坐棄擲竟置姜郎硯塘側隔  
盜微聞金粉香開奩尙帶麝脂色摩挲日劇但把弄未審  
甄人定何用買胡欲認不辨名盧女相看宛如夢連昌宮  
監老不堪落花時節來江南見此忽爾驚歎息云是先朝  
舊承值曾賜昭陽繫臂紅玉函脂粉在其中盤間花貯甘  
泉露鏡裏衣穿仁壽銅良人少使望春樹百子池前早祠  
去額畫銷硃點暈重指尖碾玉當窩處由來摘掃最煩紆  
惟此當窗好勻注紫水開脣恍瀉丹紅綿撲粉如飛絮因  
之瓦甌獨見親珠槭寶柙皆非倫履箱銀鑰擎奴子鈿合

金釵付貴嬪誰知世事頗難測金狄銅仙雨中拆拾得皇  
孫繡襦錢拋來魏后湘紋尺昭華翠琯摧井幹道傍團扇  
遮彌寒庫名宜聖總散失獨留金盃傳人間承恩當日授  
佳器前後紛綸尙能紀花箱雖好何代貽知爲宣德年間  
事我來吳會當歲除東湖水落西流魚姜郎酒後出示我  
令我抱之長歎歎黃鐘土釜本反覆幾見桑田變成谷半  
世紅顏委道途上陽白髮誰膏沐箱空脂盡粉未調當前  
若箇眞娥媼君家陳寶世無算爲汝一歌宣德審

詔觀西洋國所進獅子因獲徧閱虎圈諸獸敬製長  
句紀事和高陽相公

古皇慎德開四譯內被綏侯外蠻貊貢物區爲王會文共  
球載在賓庭冊河鐻吠翟獻上方兜離儵侏陳明堂三靈

既應百神洽般般之獸皆翺翔康熙戊午十七載神武聲  
名播遙海五時從教白澤來千門真見黃龍采鴉翎習習  
負矢飛雞斯乘之歸林支諸方執贄儼相列東漸溟渤流  
沙西於中有國名古里曾渡瀾滄作海市魚眼看波射水  
紅蛟絲織浪翻雲紫地當申未產獸雄金精傑出毛羣中  
銜繚飾組獻天子裁貝作章辭禮恭從容檻致射熊館不  
爲珍禽爲懷遠虎落時看接上林鷹房秋到移南苑廷臣  
侍從欲賦詩皇恩有詔徐觀之圓目昂鼻有筋力懸星掣  
電無雄雌獨憐形髮未卷曲曳尾繼繼若散絲衣被欲成  
綢色見牙齦不使鉤形施爾時羣檻桺諸獸木壘槍樊列  
前圍熊羆避路不用當虎豹攀欄有時吼青鸞赤雀相對  
棲豪豬野馬爭游嬉張昭見此不動色朱亥在傍何所思

聞之有熊狩陽谷獲得狻猊比牛畜漢時安息亦獻斯形  
似麒麟但無角從茲郊祀播樂章射烏格鹿非尋常饒吹  
已陳朱鷺曲徵歌還及白狼王何如儲侍未完緝詔遣求  
賢共來集東堂甫布網羅成西域剛逢旅獒入招搖乍啟  
禁籞開白麟有對皆奇才請看太保卷阿賦恍見文王靈  
囿來

武進惲仲升過話

熟食春前近扁舟江上來烏嘯木客塚雨過越王臺畏路  
行何慮空樽語易哀函關天塹杳使汝戀蒿萊

蔡五十一同伯兄過尋性西湖

故國歸難得春山望欲窮呼人谷鳥下尋弟黍苗中零雨  
淹湖寺浮雲蔽海東三年襟上血相視暮鎧紅

赴新安至七里灘作

東關苦行邁南涉上新安  
水木干雲亂沙禽拂浪寒  
孤吟隨盪槳多難負垂竿  
何日風波靜還來住此灘

泊嚴灘有感

晚泊傍斜暉臨江淚滴衣  
年華新歲改京國故人稀  
雲散崗巒彩天垂薜荔圍  
嚴陵臺下水但見暮潮歸

孝女

孝女秉幽姿靈幃展素絲  
春蘭時會鼓夜火滿叢祠  
江畔青螺水碑陰黃絹詞  
商船留賽去愁煞上潮時

經張稊舊居

尙有青堂贈甯知白馬來  
盤餐仍地主涕淚滿泉臺  
叢草留人暗繁星照戶開  
鄰家吹笛苦中夜起悲哀

十載窮泉路千秋處士廬

彭澤訓難弟晉陽書士時南

解棘楚悲黃鳥鄉潭上白魚誰憐徐氏劍猶挂子雲居

不作西州哭依然東道親文章真墜地朋舊尙爲人海鶴

何年返山花幾度春空堂樽酒夜獨坐聽雞晨

### 清流關謁關將軍祠

夫子汾川秀風流世所師關山縈峻嶺鐙火照神祠集木  
鴉飛後垂堂虎卧時同爲亡命客下馬一相思

予宿桐音宅出所賦慰詩四章妙麗愀愴諷之傷懷

### 因勉酬三詩導情

故國藏車日他鄉賣餅人秋衣憐季布夜酒對孫賓閣下  
紅蕉暗鐙前白髮新十年悲往事相顧淚盈巾

依徙當時暮還歸未晝游人辭荀里去仍向孔門投霜葉



吟東郭秋星墜北樓誰憐頻把袂猶攬舊烏裘  
困日知音少衰年好會難驚心聽漏促人語落杯寒妙句  
當筵發嬌兒出慢看夜闌生感激對飯不能餐

謁嵩嶽

太室開天表崇邱奠土中主名高四域受秩比三公日月  
環區宅陰陽割渾濛歌崧揚峻極望祀禮昭融華蓋標方  
頂金壺啟上宮翕河承漢禪卜洛載周工別觀翔修鶴層  
城倚大熊藏書憑玉女過澗遇青童洞閉能圍雪梯長恍  
御風羣山咸拱嶽萬歲自呼嵩槐弟封堯爵萑羊採少翁  
浮邱閒駕羽子晉妙吹簫石酒龍精白巖花鳳首紅煙霏  
春渺渺水滴午滌滌虛壑涵深鑛空梁拔斷虹天關應再  
闕帝座儼相通險塞分河內靈祇屈岱東神京懷舊服終

古賴攸同

行次左蠡放船出南康已來舟中寄蔡五十一仲光  
姜十七廷梧張五杉并呈施湖西趙司馬駱崇仁  
何奉新諸公

流浪還齊地蒼茫向楚隅何時經夏口此去是洪都鄉信  
淹江雁生涯寄水鳬仲宣思故國阮氏泣窮途早歲棲中  
露頻年詘負塗書曾降故將行獨後諸儒才淺人爭忌貴  
貧志亦愚山其書有罪梁燕語當誅張儉將歸塞童鴻反  
去吳相君真解綬浣女果捐軀走險胡全跋昂霄尾畢逋  
有家憐季布易氏識陶朱讎序傾金澗詩成博錦褕宅猶  
留鮑照壻欲贅淳于北顧空騏驥南行覓湛盧浮名偕草  
木放跡在菰蘆彭澤宵經縣鄱陽曉渡湖清秋涼襲袂白

日醉提壺避地依五老環波洗二孤籃輿邀栗里宮錦謝  
當途每念同袍士還思舊酒徒探書登夏穴修禊繞春蕪  
不見三秋艾相思兩地琴風舫時轉側霜柳暗周枯虛羨  
雲間鶴恆隨檣上烏懷人難命駕無道但乘桴綠水愁徒  
涉青天想共呼高峯追白社寒浦泣蒼梧妄踞洪崖室還  
尋卓氏壚無端依水馬何處憶蓴鱸去國曾捐冕通關不  
棄繻歸裝輪陸賈游仕愧秋胡最恨生多劣仍憐世善誣  
涼才宜別石暗地豈投珠嫉翠連殘羽摧翹及棄擲狂書  
焚蒯子遺論毀潛夫分鮮金箱祕情甘溷廁污張蒼三厯  
盡司馬一書無貿貿忘榮落悠悠度曉晡拂龜亡決策借  
箸昧前圖愁聽歌商女驚看秀木奴荒城頻鼓角末技厭  
吹竽抱璞思俱寂書空手自摸羈棲同燕雀輾轉似蜘蛛

海闊從浮泊天高趁遠徂留情追沅澧投老近番禺市舶  
諮梁賈仙山訪藐姑過車需載輔相驚賴匡扶猶幸逢知  
己先經宦此區刺魚跳幸舍漉酒濫軍廚免苑嘗裁賦龍  
門願棒樞燕文煩噴噴汎愛首區區南野應過眼章流久  
狹膚固將憑永久且復倚斯須飄蕩迴蓬荻遭逢任輓轡  
時方捐芻葛節又採茱萸率曠知依棧穿林念守株草留  
寒蝶栩波逐細魚濡多淚唬猿狖難行喚鷓鴣孤懷誰告  
語長望起躊躇

駕幸溫泉恭賦

羽肅句陳外波開帳殿中咸池長浴日華渚自流虹曉度  
榆關遠春從黍谷通慈寧扶葆馭時太后坐湯神策駕豐隆  
磐溢銅仙露窗含玉女風青泥分太液紫氣接居庸淨可

捐煩慮溫能養聖躬醴源逢處合仙井鑿來空衣藻沿渦  
碧巖花入照紅濼階將赴壑聽水似呼嵩鐘乳浮銀梳松  
雲鎖玉櫳起居長樂輦扈從華清宮舜德時存坎湯田歲  
轉豐甘泉徒有賦未敢擬揚雄

禹廟

夏王四載告成功別禪苗山起闕宮玉帛千秋新裸薦衣  
冠萬國舊來同金書座井封泥紫窳石懸花映篆紅一自  
百川歸海後長留風雨在江東

江徼懷人

江徼懷人江外臺江流千里重徘徊秦人島嶼乘潮上漢  
將樓船繞地迴殘壘低連沙樹暝孤城遙傍海門開西陵  
一望滔滔水不見長帆天際來

除夕逢立春效景龍體

椒盤栢酒傍江開，彩仗青旂出郭來。  
玉厯乍看今夕換，蒼龍先遣隔年回。  
林彫朔雪驚抽蕙，地近南天早見梅。  
添歲并爲除歲日，他鄉何似故鄉杯。

少年

少年抱劍出關中，羽衛新招六郡雄。  
久許報恩逾聶政，平時飲酒笑秦宮。  
雞鳴曉日黃河動，雁陣秋陰紫塞空。  
當日枌榆遷欲盡，愁君馳馬過新豐。

馬蹟懷南土

越王山下賦離羣，英布城前看落雲。  
歲暮他鄉還作客，春來何處不思君。  
天開婺女搖晴翠，水滿康郎漾夕曛。  
陽雁欲歸愁未得，幾回哀響夢中聞。

朔方

天校神兵罷朔方雙韃不復挂漁陽三秋白草綠關斷萬里黃河入塞長鐵柱分標滇外戍金書異姓漢中王從軍久負匡時略愁見開邊到夜郎

寒食渡江

吳關千里燧煙通挂去長帆返照中三月暮春行海畔兩年寒食渡江東風吹官柳城邊緣雨後山花隴上紅惆悵故園年少在鬪雞蹴鞠興誰同

舟過漁林關望沈功宗墓

落日漁林放棹遲故人宿草望離離深憐子敬琴亡後恐負橋元車過時江關市亭環廢井關長賈舶近荒祠難尋下馬陵前路腸斷膠西君不知

錢塘逢故人

西陵咫尺是天涯  
喜汝從予江上槎  
兩度陶朱思返越  
百年張儉竟無家  
鄉關恨屆鑽榆節  
里巷羞乘廣柳車  
壯士不還仍遠去  
江東兄弟慢咨嗟

奉答倪榮原韻

自辭濠上尋中散  
曾在梁園賦子虛  
入世已無操瑟想  
聞君尙有帶鋤書  
東田秋到花開後  
西浦人逢落雁初  
只道乘風應萬里  
相看猶是舊蒿蘆

覽鏡詞

漸覺鉛華盡  
誰憐顚顚新  
與余同下淚  
只有鏡中人

長門怨

玉殿金缸晚色新  
殿前少使繡麒麟  
夜來恐索長門錦  
要



賜平陽歌舞人

飲馬城邊曲

燕臺北望薊城山  
飲馬城邊驅馬還  
前度錦車休出塞  
將軍近在草橋關  
城邊飲馬莫辭遐  
將採燕山二月花  
日在陣前誰見敵  
薊門關外盡風沙

贈柳生

扶病來看柳敬亭  
秋花開滿石榴屏  
江南多少前朝事  
說與人間不忍聽

漢苑行

綵燕初翻百子池  
宮花齊發萬年枝  
但知上苑寒歸早  
不道人間春到遲

秋風歌罷柏梁材上苑春回承露臺朝來殿使探鶯去日  
暮宮官試馬來

除夕作

旅館椒花紅欲然椒盤愁向客中傳如何纔聽金雞唱便  
喚今宵是客年

弔姜貞毅詩

曾披閭闔扣天關垂死孤臣未賜環遺命一棺何處葬宣  
州城外敬亭山

唱盡門生薤上歌道傍虞殯已無多殿廷若箇能攀檻圖  
畫依然是荷戈

公像有荷戈圖

晚晴移詩匯卷四十四終